

Na osnovu čl. 221. i 223. Zakona o zdravstvenoj zaštiti („Službene novine Federacije BiH“, broj 46/10), a u vezi sa čl. 47. i 68. Zakona o stomatološkoj djelatnosti („Službene novine Federacije BiH“, broj 37/12), Skupština Stomatološka komora Federacije Bosne i Hercegovine, Upravni odbor Stomatološke komore Federacije Bosne i Hercegovine, po ovlaštenju Skupštine Stomatološke komore Federacije Bosne i Hercegovine, na 1. Redovnoj sjednici održanoj dana 24.11.2017. godine, utvrdio je prečišćeni tekst

STATUTA STOMATOLOŠKE KOMORE FEDERACIJE BOSNE I HERCEGOVINE (Prečišćen tekst)

I – OSNOVNE ODREDBE

Član 1.

Ovim Statutom uređuje se usklađivanje rada Komore liječnika-doktora stomatologije Federacije Bosne i Hercegovine (u daljem tekstu: Komora) sa Zakonom o stomatološkoj djelatnosti („Službene novine Federacije BiH“, broj 37/12).

Usklađivanje rada iz stava 1. ovog člana podrazumjeva usklađivanje naziva Komore, djelokruga i organizacije rada Komore; sastava Skupštine, te organa i tijela Komore, načinu njihovog izbora, uvjetima i načinu opoziva, trajanja mandata, načinu odlučivanja i odgovornosti; funkcioniranje strukovnih razreda i djelokruga njihovog rada; zastupljenosti strukovnih razreda u organima Komore; zastupanju i predstavljanju Komore; nadležnostima Komore; znaka, pečata i pravnog statusa Komore; načina finansiranja Komore, te uvjeta korištenja i raspolaganja finansijskim sredstvima Komore; članstva u Komori; uvjetima i načinu učlanjivanja u Komoru; prava i obaveze članova Komore; prestanka članstva u Komori; načinu vođenja registra licenciranih članova Komore; sadržaja, rokova i načina stručnog usavršavanja članova Komore saglasno zajedničkom sadržaju stručnog usavršavanja koje utvrdi Komora; postupka izdavanja, obnavljanja i oduzimanja licence, dobnu granicu do koje se licenca obnavlja, uvjeta pod kojima se razmatra obnavljanje licence, te obaveza davanja izvještaja nadležnom ministru zdravstva ukoliko kandidat ne udovolji uvjetima za obnavljanje odnosno oduzimanje licence, kao i pravila postupanja u vezi sa navedenim; javnosti rada; načinu donošenja Statuta, izmjenama i dopuna Statuta, drugih akata koji proističu iz ovog Statuta; granice, način i druga pitanja vezana za ostvarenje javnih ovlaštenja iz člana 221. Zakona o zdravstvenoj zaštiti („Službene novine Federacije BiH“, broj 46/10)(u daljem tekstu: Zakon), te druga pitanja koja su od značaja za rad Komore saglasno Zakonu, Zakonu o stomatološkoj djelatnosti, kao i propisima donijetim na osnovu tih zakona.

II- NAZIV, SJEDIŠTE I ČLANSTVO KOMORE

Član 2.

Komora iz člana 1. stava 1. ovog statuta, mijenja svoj naziv koji sada glasi:

„STOMATOLOŠKA KOMORA FEDERACIJE BOSNE I HERCEGOVINE“.

Za komunikaciju u međunarodnom pravnom saobraćaju, Komora koristi naziv na engleskom jeziku koji glasi:

THE DENTAL CHAMBER OF FEDERATION BOSNIA AND HERCEGOVINA.

Član 3.

Sjedište Komore je u Sarajevu, ul. Antuna Hangija do br.3

Član 4.

Komora iz člana 1, a u vezi sa članom 2. ovog statuta je nezavisno, samostalno strukovno udruženje doktora stomatologije, zubnih tehničara i stomatoloških sestara-tehničara (u daljem tekstu: stomatološki radnici) koja čuva i štiti interese stomatološke profesije na teritoriju Federacije Bosne i Hercegovine (u daljem tekstu: Federacija); zadovoljava stručne i lične potrebe stomatoloških radnika; osigurava uvjeta za organizovan nastup stomatoloških radnika prema organima vlasti svih nivoa, zavodima zdravstvenog osiguranja u Federaciji, komorama iz oblasti zdravstva osnovanim na kantonalnom i federalnom nivou, komorama stomatoloških radnika u Bosni i Hercegovini (u daljem tekstu: BiH), zemljama okruženja i Evropskoj uniji, stomatološkim udruženjima u BiH, zemljama okruženja i Evropskoj uniji; posebno FDI, ERO-u i FEDCAR-u, te drugim evropskim i svjetskim udruženjima koje se bave stomatološkom profesijom, te štiti zdravlja građana Federacije.

III- ZNAK, PEČAT I PRAVNI STATUS

Član 5.

Komora iz člana 1, a u vezi sa članom 2. ovog statuta počinje svoj rad sa danom upisa promjena utvrđenih ovim statutom u sudski registar kod nadležnog suda.

Komora djeluje na teritoriju Federacije.

Član 6.

Komora ima svoj žiro račun.

Član 7.

Komora ima pečat.

Pečat Komore je okruglog oblika, promjera 50x15 mm u kome je koncentričnim krugovima upisan tekst: "Stomatološka komora Federacije Bosne i Hercegovine- The Dental Chamber of Federation of Bosnia and Herzegovina" kao i broj pečata.

Komora može imati i znak, o čemu odluku donosi Skupština Komore.

Znak Komore iz stava 2. ovog člana može biti stiliziran.

Odluku o broju pečata, načinu upotrebe i čuvanja donosi predsjednik Komore.

IV- NADLEŽNOSTI KOMORE

Član 8.

Usklađene nadležnosti Komore, saglasno odredbama Zakona o zdravstvenoj zaštiti i Zakona o stomatološkoj djelatnosti, su:

- utvrđivanje zajedničkih kriterija za licenciranje članova kantonalnih komora odnosno Komore,
- po službenoj dužnosti izdavanje, obnavljanje i oduzimanje licenci svojim članovima na osnovu zajedničkih kriterija utvrđenih od strane ove Komore za članove Komore koji prava i obaveze koriste i ostvaruju kao članovi federalne komore,
- utvrđivanje sadržaja i izgleda registra licenciranih članova Komore odnosno članova kantonalne komore i vođenje registra članova Komore,
- vođenje jedinstvenog registra licenciranih članova Komore odnosno članova kantonalnih komora,
- utvrđivanje zajedničkih sadržaja stručnog usavršavanja, rokova i postupka provjere stručnosti ponaosob za doktore stomatologije, zubne tehničare i stomatološke sestre-tehničare koje su ostvarili u okviru stručnog usavršavanja,
- organizovanje kontinuiranog obavljanja stručnog usavršavanja za sve profile stomatoloških radnika saglasno Zakonu i propisima donijetim na osnovu Zakona,
- organizovanje dodatnog usavršavanja za proširenje djelatnosti unutar struke s obzirom na nove zdravstvene tehnologije u oblasti stomatologije,

- utvrđivanje načina i uvjeta za upravljanje novim zdravstvenim tehnologijama i certificiranje članova Komore za upravljanje novim zdravstvenim tehnologijama za doktora stomatologije, zubne tehničare i stomatološke sestre-tehničare,
- donošenje Kodeksa stomatološke etike i deontologije zasnovanog na principima FDI, Kodeksa etike i deontologije zubnih tehničara i stomatoloških sestara-tehničara, praćenje i nadziranje njihovog provođenja, te poduzimanje odgovarajućih mjera u slučaju njihovog kršenja na teritoriju Federacije,
- davanje prijedloga federalnom ministru zdravstva za dodjelu naziva primarijus doktorima stomatologije saglasno Zakonu i Pravilniku o uvjetima, kao i kriterijima i postupku za dodjelu naziva primarijus („Službene novine Federacije BiH“, broj 21/12),
- davanje prijedloga mišljenja nadležnom ministru zdravstva o opravdanosti izdavanja, produženja ili oduzimanja odobrenja za obavljanje poslova privatne prakse stomatoloških radnika, te početka, proširenja, promjene i prestanka rada zdravstvenih ustanova koje obavljaju stomatološku djelatnost, i to sa pozicije i očuvanja profesije koju zastupa, saglasno općem aktu komore iz ove oblasti,
- davanje mišljenja za obavljanje dopunskog rada doktorima stomatologije saglasno Zakonu i propisima donijetim na osnovu tog Zakona,
- utvrđivanje maksimalne cijene stomatoloških usluga za privatnu praksu stomatoloških radnika koja ne ostvaruje prihode putem zavoda osiguranja kantona i ovjeravanje cjenovnika stomatoloških usluga privatne prakse stomatoloških radnika,
- davanje mišljenja na cijene stomatoloških usluga iz dobrovoljnog zdravstvenog osiguranja,
- učestvovanje u izradi standarda i normativa u oblasti stomatologije,
- čuvanje i unapređivanje društvenog položaja i digniteta stomatoloških radnika,
- zastupanje interesa svojih članova kod sklapanja ugovora sa zavodom zdravstvenog osiguranja Federacije odnosno kantona i drugim osiguravajućim zavodima,
- osiguravanje zaštite građanima u ostvarivanju prava s obzirom na kvalitet, sadržaj i vrstu stomatološke usluge koja im se pruža,
- davanje stručnog mišljenja kod pripreme propisa koji su od uticaja na razvoj stomatološke struke,
- davanje stručnog mišljenja kod izrade nastavnih planova i programa stomatoloških fakulteta i srednjih škola za zubne tehničare i stomatološke sestre-tehničare prema potrebama stomatološke struke,
- provođenje kontrole načina oglašavanja i način isticanja naziva privatne prakse stomatoloških radnika, te utvrđivanje slučajeva koji se ne smatraju reklamiranjem stomatoloških usluga,
- obavljanje stručnog nadzora nad radom stomatoloških radnika: doktora stomatologije, zubnih tehničara i stomatoloških sestara-tehničara saglasno Zakonu o stomatološkoj djelatnosti, kao i propisima donijetim na osnovu tog zakona, te odredbama ovog statuta,
- formiranje fondova za pomoć svojim članovima,
- zaštita materijalnih i drugim interesa svojih članova,
- pružanje pravne pomoći svojim članovima i organizovanje mogućnosti osiguranja protiv odštetnih zahtjeva iz oblasti stomatološke djelatnosti,
- izdavanje svog lista, te stručnih i drugih informativnih publikacija,
- saraduje sa komorama iz oblasti zdravstva, kao stomatološkim udruženjima u BiH i inostranstvu, posebno ERO-om i FEDCAR-om,
- davanje stručnog mišljenja nadležnim ministarstvima obrazovanja o potrebnom broju studenata koji se upisuju na na stomatološke fakultete u Federaciji (numerus clausus), sa aspekta principa stomatološke zaštite, kao i potrebama na tržištu rada u sektoru zdravstva
- obavljanje i drugih poslova određenih Zakonom, Zakonom o stomatološkoj

djelatnosti, kao i propisima donijetim na osnovu tih zakona, kao i ovim statutom.

Saglasno Zakonu o klasifikaciji djelatnosti u Federaciji Bosne i Hercegovine („Službene novine Federacije BiH“, broj 64/07 i 80/11) djelatnost Komore je:

94.11 i 91,110

V- JAVNA OVLAŠTENJA

Član 9.

Komora obavlja javna ovlaštenja koja su utvrđena Zakonom, kao propisima donijetim na osnovu Zakona.

Komora vodi registar licenciranih članova Komore, druge upisnike i evidencije.

Komora vodi posebne upisnike za članove Komore u stručnom zvanju: doktora stomatologije, doktora stomatologije-specijalistu, zubnog tehničara, stomatološku sestru-tehničara, kao i disciplinski registar.

Registri iz st. 2. i 3. ovoga člana su javne knjige.

Izvaci iz registra iz st. 2. i 3. ovoga člana, te potvrde izdate na osnovu podataka iz tih evidencija su javne isprave.

Komora štiti pravo na privatnost svojih članova saglasno Zakona o zaštiti ličnih podataka Bosne i Hercegovine ("Službeni glasnik BiH", broj 32/01).

Član 10.

Usklađena javna ovlaštenja Komore, saglasno odredbama Zakona o zdravstvenoj zaštiti i Zakona o stomatološkoj djelatnosti, su:

- po službenoj dužnosti izdaje, obnavlja i oduzima licence svojim članovima na osnovu zajedničkih kriterija utvrđenih od strane ove Komore za članove Komore koji prava i obaveze koriste i ostvaruju kao članovi federalne komore,
- vodi jedinstven registar licenciranih članova Komore odnosno članova kantonalnih komora,
- organizovanje kontinuranog obavljanje stručnog usavršavanja za sve profile stomatoloških radnika saglasno Zakonu i propisima donijetim na osnovu Zakona,
- organizovanje dodatnog usavršavanja za proširenje djelatnosti unutar struke s obzirom na nove zdravstvene tehnologije u oblasti stomatologije,
- certificira članove Komore za upravljanje novim zdravstvenim tehnologijama,
- daje prijedlog federalnom ministru zdravstva za dodjelu naziva primarijus doktorima stomatologije saglasno Zakonu i Pravilniku o uvjetima, kao i kriterijima i postupku za dodjelu naziva primarijus („Službene novine Federacije BiH“, broj 21/12),
- daje prijedlog mišljenja nadležnom ministru zdravstva o opravdanosti izdavanja, produženja ili oduzimanja odobrenja za obavljanje poslova privatne prakse stomatoloških radnika, te početka, proširenja, promjene i prestanka rada zdravstvenih ustanova koje obavljaju stomatološku djelatnost, i to sa pozicije i očuvanja profesije koju zastupa, saglasno općem aktu komore iz ove oblasti,
- daje mišljenja za obavljanje dopunskog rada doktorima stomatologije u skladu sa Zakonom i propisima donijetima na osnovu Zakona,
- utvrđuje maksimalnu cijene stomatoloških usluga za privatnu praksu stomatoloških radnika koja ne ostvaruje prihode putem zavoda osiguranja kantona i ovjerava cjenovnik stomatoloških usluga privatne prakse stomatoloških radnika,
- obavlja stručni nadzor nad radom stomatoloških radnika: doktora stomatologije, zubnih tehničara i stomatoloških sestara-tehničara saglasno Zakonu o stomatološkoj djelatnosti, kao i propisima donijetim na osnovu tog zakona, te odredbama ovog statuta,
- obavlja i druga javna ovlaštenja u skladu sa Zakonom i propisima donijetim na osnovu Zakona.

VI- FINANSIRANJE KOMORE I NAČIN UPRAVLJANJA I RASPOLAGANJA SREDSTVIMA KOMORE

Član 11.

Komora se koristi materijalnim i novčanim sredstvima.

Komora stiče novčana sredstva potrebna za rad, u skladu sa članom 221. Zakona, kao i ovim statutom, i to:

- iz članarina,
- dobrovoljnih priloga i poklona fizičkih i pravnih lica,
- sredstva dodijeljena iz budžeta,
- prihodima od kamata, dividendi, dobiti od kapitala, zakupnina, honorara i sličnih izvora pasivnih prihoda,
- drugi prihodi stečeni u skladu sa Zakonom i ovim statutom.

Član 12.

Sredstvima Komore raspolaže predsjednik Komore, na osnovu finansijskog plana.

Nadzor nad korištenjem sredstava Komore vrši Skupština.

Skupština je nadležna za kontrolu svih dokumenata koji se odnose na finansijsko poslovanje, posebno periodičnog, polugodišnjeg i završnog finansijskog izvještaja.

Dokumente iz stava 2. ovog člana Skupština razmatra na redovnoj godišnjoj, a po potrebi i vanrednoj sjednici Skupštine.

Član 13.

Komora je dužno voditi poslovne knjige i sastavljati finansijske izvještaje, u skladu sa Zakonom i drugim propisima.

Finansijsku dokumentaciju potpisuje predsjednik Komore, te je isti ujedno i odgovorno lice za materijalno-finansijsko poslovanje Komore

Finansijsko poslovanje uredit će se posebnim aktom Skupštine.

VII-ČLANSTVO U KOMORI

Član 14.

Članstvo u Komori je obaveza i čast za sve stomatološke radnike, državljane Federacije, BiH, koji obavljaju poslove i zadatke svog stručnog zvanja, i to: doktori stomatologije, doktori stomatologije-specijalisti, zubni tehničari i stomatološke sestre-tehničari na teritoriji Federacije i koji potpiše odluku o prihvatanju Kodeksa stomatološke etike i deontologije odnosno Kodeksa etike i deontologije zubnih tehničara i stomatoloških sestara-tehničara.

Član Komore može biti i stomatološki radnik, državljanin Federacije, BiH, korisnik starosne penzije uz uvjet da svake godine predoči Komori uredno liječničko uvjerenje.

Stomatološki radnik koji je korisnik invalidske penzije ne može koristiti pravo iz stava 2. ovog člana.

Članovi Komore su i stomatološki radnici, strani državljani koji imaju certifikat za obavljanje stomatološke djelatnosti u matičnoj državi, te koji obavljaju stomatološku djelatnost u Federaciji u skladu sa Zakonom, kao i drugim propisima koji regulišu oblast zapošljavanja stranih državljana, te ispunjavaju opće uvjete iz propisa o kretanju i boravku stranaca, kao i azilu.

Članovi Komore mogu biti i nezaposleni doktori stomatologije prijavljeni na Zavod za zapošljavanje.

Svi članovi Komore su potpuno ravnopravni, bez obzira na mjesto zaposlenja.

Član 15.

Komora vodi registre svojih članova koji predstavlja javne knjige saglasno članu 9. stav 4. ovog statuta i čuvaju se u Komori.

U registar članova Komore upisuju se slijedeći podaci: ime i prezime stomatološkog radnika; datum i mjesto rođenja; državljanstvo; naznačavanje datuma i mjesta završetka stomatološkog fakulteta odnosno srednje škole za zubne tehničare i stomatološke setre-tehničare; datum polaganja stručnog ispita; naznačavanje osnovne specijalnosti koju član posjeduje, te naznačavanje naučno-nastavnog zvanja; datum potpisivanja odluke o prihvatanju Kodeksa farmaceutske etike i deontologije; datum polaganja svečane izjave; datum upisa u Registar, broj i datum rješenja o upisu, te broj i datum licence; promjene nastale tokom članstva; brisanje iz Registra i razlog brisanja; podaci o funkcijama u organima Komore.

U disciplinski registar upisuju se izrečene pravosnažne odluke članovima Komore od strane Suda časti.

Član 16.

Članovi Komore imaju pravo:

- na rad u skladu sa Zakonom, kao i propisima iz oblasti zdravstva, a saglasno materijalnim mogućnostima zdravstvenog sistema Federacije,
- da budu ravnopravni članovi stomatološkog tima saglasno Zakonu o stomatološkoj djelatnosti, kao i Zakonu,
- odbijanja učestvovanja u naučno-istraživačkim projektima ako nisu neophodni u stomatološkoj pomoći,
- odbijanja da urade poslove i zadatke za koje nisu stručno osposobljeni,
- organiziranja, obavljanja i provođenja, te pravilnog vrednovanja stomatološke djelatnosti u praksi,
- na stručno usavršavanje kroz specijalizaciju za doktore stomatologije odnosno kontinuirano stručno usavršavanje koje organizira Komora za sve profile stomatoloških radnika, saglasno Zakonu i propisima donesenim na osnovu tog zakona,
- na sticanje počasnog naziva primarijus za doktora stomatologije saglasno Zakonu i propisima donesenim na osnovu tog zakona,
- učestvovanja u stručnom nadzoru saglasno Zakonu o stomatološkoj djelatnosti i propisima donijetim na osnovu tog zakona,
- druga prava koja proističu iz propisa iz oblasti zdravstva,
- da biraju i da budu birani u organe Komore, te budu birani za delegate Skupštine,
- na usluge Komore, a koje proizilaze iz čl. 8, 9. i 10. ovog Statuta,
- druga prava koja proizilaze iz ovog statuta, akata donijetih na osnovu Statuta, kao i odluka i zaključaka organa Komore.

Član 17.

Članovi Komore imaju obavezu:

- obavljati poslove stomatološke djelatnosti stručno i etički besprijekorno saglasno pravilima struke, primjenom savremenih postupaka i tehnologija u stomatologiji, te praćenjem dostignuća u razvoju stomatološke nauke i uz poštovanje kodeksa stomatološke etike i deontologije,
- pružiti hitnu stomatološku pomoć bez odlaganja, a ostale pacijente primati prema stepenu prioriteta odnosno prema listi čekanja,
- poštovati prava pacijenta utvrđena Zakonom o pravima, obavezama i odgovornostima pacijenta ("Službene novine Federacije BiH", broj 40/10),
- prijaviti zarazna oboljenja koja podliježu obaveznom prijavljivanju saglasno Zakonu o zaštiti stanovništva od zaraznih bolesti ("Službene novine Federacije BiH", broj 29/05), kao i propisima donesenim na osnovu tog zakona,
- prijaviti nadležnom organu ukoliko tokom obavljanja stomatološke djelatnosti posumnja da je smrt ili tjelesna ozljeda pacijenta nastala nasilnim putem saglasno propisima o krivičnom postupku,

- voditi i čuvati stomatološku dokumentaciju saglasno propisima o evidencijama u oblasti zdravstva, kao i propisima o čuvanju arhivske građe u Federaciji,
- obavezno se stručno usavršavati radi održavanja i unaprjeđenja kvaliteta stomatološke djelatnosti u skladu sa ovim zakonom, kao i Zakonom o zdravstvenoj zaštiti,
- omogućiti obavljanje stručnog nadzora i pružiti sve potrebne podatke i obavijesti Odbor za obavljanje stručnog nadzora nad radom stomatoloških radnika saglasno Zakonu o stomatološkoj djelatnosti i propisima donijetim na osnovu tog zakona, kao i odredbama ovog statuta,
- poštovati načelo čuvanja profesionalne tajne,
- obavezno saradivati sa drugim članovima u stomatološkom timu, ostalim službama primarne zdravstvene zaštite posebno sa timovima porodične medicine, pedijatrima, te ostalim specijalistima za koje se ukaže potreba, kao i višim nivoima stomatološke zaštite,
- provoditi Statuta Komore, druge akata donijete na osnovu Statuta, te odluke i zaključake organa Komore,
- redovno dostavljati sve podataka koje traži Komora u skladu sa svojim propisima,
- dostavljati informacija koje ukazuju na nepravilnost u radu članova Komore i koje utiču na obavljanje stomatološke djelatnosti i koje moraju biti potpisane od podnosioca informacije, jer se anonimne informacije neće uzimati u razmatranje,
- redovno plaćati članarine i druga davanja koje utvrdi Komora, kontinuirano se stručno usavršavati u poslovima svog zvanja na način i pod uvjetima kako utvrdi Komora,
- obavljati i druge poslove i zadatke koji proističu iz Zakona, Zakona o stomatološkoj djelatnosti, kao i propisa donijetih na osnovu tih zakona, Statuta Komore, ta akata donijetih na osnovu ovog statuta.

Član 18.

Članstvo u Komori prestaje:

- oduzimanjem licence u skladu sa ovim statutom,
- prestankom obavljanja poslova i zadataka stomatološkog radnika na teritoriju Federacije,
- u slučaju da stomatološki radnik koji je penzioner u starosnoj penziji ne posjeduje uredno liječničko uvjerenje,
- neplaćanjem članarine 3 mjeseca
- smrću člana Komore.

VIII- POSTUPAK IZDAVANJA, OBNAVLJANJA I ODUZIMANJA LICENCE

Član 19.

Doktor stomatologije, zubni tehničar, stomatološka sestra-tehničar se nakon položenog stručnog ispita u struci, obavezno upisuju kod Komore u registar i time stiču pravo na izdavanje licence odnosno pravo na samostalan rad u struci.

Član 20.

Licenca je javna isprava koju izdaje Komora, saglasno Zakonu, kao i pravilniku o postupku izdavanja licence od strane Komore, kao i sadržaju i izgledu licence koji donosi federalni ministar zdravstva u skladu sa članom 148. stav 3. Zakona, te ovom statutu.

Komora obavlja provjeru ispunjenosti uvjeta za svoje članove i to: posjedovanja diplome stomatološkog fakulteta odnosno svjedočanstva srednje škole za zubne tehničare odnosno stomatološke sestre-tehničare; u slučaju da su stomatološki fakultet odnosno srednja škola za zubne tehničare odnosno stomatološke sestre-tehničare završeni izvan BiH dokaz o nostrifikaciji stomatološkog fakulteta odnosno srednje škole saglasno propisima o visokom obrazovanju odnosno propisima o srednjem obrazovanju; dokaz o položenom stručnom ispitu

u stručnom zvanju doktora stomatologije, zubnog tehničara odnosno stomatološke sestre-tehničara, a u slučaju da je stručni ispit za navedena stručna zvanja položen izvan BiH dokaz o priznatom stručnom ispitu od strane Federalnog ministarstva zdravstva za doktore stomatologije odnosno kantonalnog ministarstva zdravstva za zubne tehničare i stomatološke sestre-tehničare saglasno Zakonu i propisima donijetim na osnovu Zakona; dokaz o položenom specijalističkom odnosno subspecijalističkom ispitu ako ga doktor stomatologije posjeduje; državljanstvo Federacije odnosno BiH; dokaz o poslovnoj sposobnosti.

U slučaju izdavanja licence medicinskim sestrama-tehničarima zatečenim na radnom mjestu stomatološke sestre-tehničara saglasno članu 67. Zakona o stomatološkoj djelatnosti, Komora provjerava ispunjenost sljedećih uvjeta: završena srednja medicinska škola, položen stručni ispit u struci medicinske sestre-tehničara, dokaz da je zatečena na radnom mjestu stomatološke sestre-tehničara na dan stupanja na snagu Zakona o stomatološkoj djelatnosti i dokaz o obavljenoj dokvalifikaciji iz oblasti stomatologije.

Izuzetno, za stomatološke radnike: doktore stomatologije, zubne tehničare, stomatološke sestre-tehničare, strane državljanke pored dokaza iz stava 2. ovog člana, traži se i posjedovanje certifikata za obavljanje stomatološke djelatnosti u matičnoj državi, dokaz o stranom državljanstvu, dokaz o kretanju stranaca izdat od nadležnog organa u BiH saglasno propisima o kretanju i boravku stranaca, kao i azilu, radna dozvola za strance izdata u od nadležnog organa u skladu sa propisima koji regulišu oblast zapošljavanja stranih državljana.

Komora je dužna postupak provjere ispunjenosti uvjeta za dodjelu licence obaviti u roku od 15 dana od dana podnošenja zahtjeva, te nakon toga izdati licencu.

Ukoliko Komora utvrdi da nisu ispunjeni uvjeti za dodjelu licence, donosi odluku o odbijanju zahtjeva kao neosnovanog.

Protiv odluke iz stava 5. ovog člana može se izjaviti žalba u roku od 15 dana Upravnom odboru komore. Drugostepeni organ za žalbu je Predsjednik komore.

Licenca iz stava 1. ovog člana izdaje se sa rokom važenja od šest godina i obnavlja se u skladu sa Zakonom, kao i propisom Komore iz ove oblasti, a kojim se utvrđuje zajednički sadržaj stručnog usavršavanja, rokovi i postupak provjere stručnosti koje je stomatološki radnik ostvario u okviru stručnog usavršavanja.

Licencom iz stava 1. ovog člana stomatološki radnik stiče pravo samostalnog obavljanja poslova u svojoj struci.

Stomatološki radnik: doktor stomatologije, zubni tehničar, stomatološke sestre-tehničari obavljaju poslove svoje profesije, samo u okviru svog stručnog naziva određenog licencom izdatom od Komore.

Član 21.

Stomatološkom radniku se može oduzeti licenca, u slijedećim slučajevima:

- ako stomatološki radnik ne ispunjava uvjete prilikom obnavljanja licence propisanim Zakonom, ovim Statutom i aktima donijetim na osnovu ovog statuta,
- ukoliko mu je oduzimanje licence izrečeno kao kazna zbog kršenja etičkih principa struke,
- ukoliko dopunski rad doktori stomatologije obavljaju suprotno odredbama Zakona, kao i propisa donijetih na osnovu tog zakona.

Član 22.

Protiv odluke kojim se stomatološkom radnik ne obnavlja odnosno oduzima licenca može se izjaviti žalba predsjedniku Komore u roku od 15 dana od dana prijema odluke.

Član 23.

U slučajevima neobnavljanja odnosno oduzimanja licence stomatološkom radniku u skladu sa Zakonom, propisima donijetim na osnovu tog zakona, ovim statutom, kao i aktima donijetim na osnovu statuta, Komora je dužna u roku od sedam dana od dana pravosnažnosti odluke kojim se stomatološkom radniku neobnavlja odnosno oduzima licenca izvestiti člana Komore, njegovog poslodavca, kao i nadležno ministarstvo zdravstva.

IX- ORGANIZACIJA KOMORE

Član 24.

Pri Komori se, saglasno Zakonu o stomatološkoj djelatnosti, formiraju sljedeći strukovni razredi, i to:

1. **Strukovni razred zubnih tehničara;**
2. **Strukovni razred stomatoloških sestra-tehničara.**

X- ORGANI KOMORE

Član 25.

U cilju efikasnijeg obavljanja stručnih poslova, odnosno efikasnije zaštite interesa njenih članova, Komora djeluje kao jedinstvena cjelina na teritoriji Federacije.

Član 26.

Organi Komore, saglasno odredbama Zakona o zdravstvenoj zaštiti i Zakona o stomatološkoj djelatnosti, su:

- Skupština,
- Upravni odbor,
- Predsjednik Komore i dva podpredsjednika Komore, koji se istovremeno po svojoj funkciji predsjednik i potpredsjednici Skupštine
- Upravni odbor Strukovnog razreda zubnih tehničara,
- Upravni odbor Strukovnog razreda stomatoloških sestara- tehničara,
- Nadzorni odbor,
Sud časti, i to: Suda časti prvog stepena i Visoki sud časti drugog stepena,
- Tužilac Komore,
- Branilac Komore.

Komora može osnovati i slijedeće odbore, i to:

- Odbor za stomatološku etiku i deontologiju,
- Odbor za stručna pitanja,
- Odbor za stručno usavršavanje,
- Odbor za staleška pitanja i privatnu praksu,
- Odbor za obavljanje stručnog nadzora nad radom stomatoloških radnika,
- Odbor za obavljanje vještačenja,
- Odbor za ekonomsko-finansijska pitanja,
- Odbor za administrativna pitanja.

Za obavljanje svojih poslova Skupština može osim odbora iz stava 2. ovog člana osnovati i druge odbore.

Za obavljanje funkcije u organima komore, pored kriterija predviđenih ovim Statutom, član komore mora ispunjavati i sljedeće uvjete:

- da je član Komore najmanje 2 godine,
- da nema dugovanja prema Komori,
- da nije po bilo kojem osnovu isključen ili brisan iz knjige Registra Stomatološke komore Federacije Bosne i Hercegovine.

Član 27.

Upravni odbor Komore bira delegate za Skupštinu Komore, izuzev za Osnivačku Skupštinu.

Za Osnivačku skupštinu delegate predlaže i bira Inicijativni Odbor za formiranje Komore.

Za delegata za Skupštinu mogu se predložiti stomatološki radnici: doktor stomatologije, zubni tehničar, stomatološka sestra-tehničar sa područja izborne jedinice, ako ispunjavaju sljedeće kriterije, i to: stomatološki radnici sa posebnim rezultatima u oblasti unapređenja i razvoja stomatološke struke; dokaz da se radi o moralnoj ličnosti koja tokom svoje karijere nije počinila profesionalnu grešku, te nije povrijedila Kodeks stomatološke etike i deontologije; dugogodišnje radno iskustvo u struci; upućenost u rad Komore i organa Komore, kao i stomatološke struke uopće; da je član Komore najmanje 2 godine, da nema dugovanja prema Komori, te da nije po bilo kom osnovu isključen ili brisan iz knjige Registra Komore.

Član 28.

Ukoliko se ne provedu izbori za delegate Skupštine ili za druge organe Komore, dosadašnji delegati Skupštine, odnosno članovi organa Komore nastavljaju obavljati svoje funkcije do izbora novih delegata odnosno članova.

1.Skupština**Član 29.**

Skupština je najviši organ Komore.

Usklađen sastav Skupštine, saglasno odredbama Zakona o zdravstvenoj zaštiti i Zakona o stomatološkoj djelatnosti, podrazumjeva da jednu izbornu jedinicu čini područje kantona, a broj delegata Skupštine po izbornim jedinicama utvrđuje se kako slijedi:

- Kanton Sarajevo 8 delegata, od toga: 6 doktora stomatologije; 1 zubni tehničar i 1 stomatološka sestra-tehničar;
- Tuzlanski kanton 5 delegata, od toga: 4 doktora stomatologije;.1 stomatološka sestra-tehničar;
- Zeničko-Dobojski kanton 5 delegata, od toga: 3 doktora stomatologije;.1 zubni tehničar i 1 stomatološka sestra-tehničar;
- Srednjobosanski kanton/ Kanton Središnja Bosna 3 delegata, od toga: 2 doktora stomatologije i 1 zubni tehničar
- Hercegovačko-neretvanski kanton 5 delegata, od toga: 4 doktora stomatologije i 1 stomatološka sestra-tehničar;
- Unsko-sanski kanton 4 delegata, od toga: 3 doktora stomatologij i 1 zubni tehničar;.
- Zapadno-hercegovački kanton 3 delegata, od toga: 2 doktora stomatologije i 1 stomatološka sestra-tehničar;
- Posavski kanton 2 delegata, od toga: 1 doktora stomatologije i 1 zubni tehničar;.
- Kanton 10 3 delegata, od toga: 2 doktora stomatologije i 1 stomatološka sestra-tehničar;
- Bosansko-podrinjski kanton delegata, od toga: 1 doktora stomatologije i 1 zubni tehničar.

Član 30.

Usklađene nadležnosti Skupštine, saglasno odredbama Zakona o zdravstvenoj zaštiti i Zakona o stomatološkoj djelatnosti, podrazumjevaju obavljanje slijedećih poslova:

- donosi Odluku o osnivanju Komore i Statut Komore,
- donosi Kodeks stomatološke etike i deontologije, kao i Kodeks etike i deontologije zubnih tehničara i stomatoloških sestara-tehničara, zasnovan na Kodeksu FDI
- donosi poslovnik o svom radu,

- daje saglasnost na poslovnik o radu Upravnog odbora, upravnih odbora strukovnih razreda, i Nadzornog odbora,
- daje saglasnost na poslovnik o radu odbora Komore, ako ih formira,
- utvrđuje zajedničke kriterije za licenciranje članova kantonalnih komora odnosno Komore,
- utvrđuje sadržaj i izgled registra licenciranih članova Komore,
- utvrđuje zajednički sadržaj stručnog usavršavanja, rokove i postupak provjere stručnosti ponaosob za doktore stomatologije, zubne tehničare i stomatološke sestre-tehničare, a koje su stomatološki radnici obavezni ostvariti u okviru stručnog usavršavanja,
- utvrđuje način i uvjete za upravljanje novim zdravstvenim tehnologijama ponaosob za doktore stomatologije, zubne tehničare i stomatološke sestre-tehničare,
- donosi opći akt kojim se uređuju bliži kriteriji na osnovu kojih izdaje mišljenje o opravdanosti izdavanja, produženja ili oduzimanja odobrenja za obavljanje poslova privatne prakse stomatoloških radnika, te početka, proširenja, promjene i prestanka rada zdravstvenih ustanova koje obavljaju stomatološku djelatnost, i to sa pozicije i očuvanja profesije koju zastupa,
- donosi opći akt na osnovu kojeg daje mišljenje o obavljanju dopunskog rada doktora stomatologije,
- donosi opći akt o načinu oglašavanja i načinu isticanja privatne prakse stomatoloških radnika, te utvrđuju slučajeve koji se ne smatraju reklamiranjem stomatoloških usluga,
- donosi druge akte predviđene ovim Statutom,
- utvrđuje finansijski plan Komore i završni račun, na prijedlog Upravnog odbora,
- donosi odluku o visini članarine i drugih prihoda,
- bira i razrješava predsjednika i potpredsjednike Komore, koji se istovremeno po svojoj funkciji predsjednik i potpredsjednici Skupštine,
- imenuje i razrješava predsjednika i članove Upravnog, upravnih odbora strukovnih razreda, kao i Nadzornog odbora,
- bira i razrješava predsjednika i članove Suda časti prvog i drugog stepena,
- imenuje i razrješava Tužioca Komore,
- utvrđuje listu branioca Komore,
- imenuje i razrješava predsjednika i članove odbora iz člana 26. Statuta,
- usvaja izvještaje Upravnog odbora, upravnog odbora strukovnih razreda, i Nadzornog odbora, te svih organa Komore,
- rješava u konačnici pitanje zaštite strukovnog interesa: doktora stomatologije, zubnih tehničara odnosno stomatoloških sestara-tehničara u slučaju stavljanja veta na glasanje o dokumentima i aktima iz nadležnosti Skupštine, a kojima se povrjeđuje strukovni interes stomatoloških radnika ponaosob i koji pokrenu strukovni razredi odnosno 15 doktora stomatologije, koji su delegati Skupštine,
- odlučuje o povezivanju i saradnji Komore sa drugim srodnim organizacijama,
- donosi i druge odluke iz djelokruga rada Komore.

U slučaju da jedan od strukovnih razreda odnosno 10 doktora stomatologije delegata Skupštine stavi veto na glasanje o dokumentima i aktima iz nadležnosti Skupštine, a kojima se povrjeđuje strukovni interes stomatoloških radnika ponaosob, Skupština formira zajedničku komisiju od 8 članova koju čine: 4.doktora stomatologije, 2 zubna tehničara, 2 stomatološke sestare-tehničara.

Komisija iz stava 2. ovog člana dužna je Skupštini u roku od 30 dana od dana izjavljenog veta izjasniti se da li je ili ne povrjeđen strukovni interes stomatoloških radnika ponaosob, te predložiti pismeno rješenje konkretnog slučaja.

Odluka Skupštine donijeta na osnovu prijedloga Komisije iz stava 3. ovog člana je konačna.

Član 31.

Skupštinu saziva predsjednik Komore, koji je istovremeno po svojoj funkciji i predsjednik Skupštine.

Redovna sjednica Skupštine održava se jednom godišnje.

Zahtjev za sazivanje vanredne sjednice Skupštine može podnijeti predsjednik Komore i potpredsjednici Komore, koji su istovremeno i predsjednik i potpredsjednici Skupštine, Upravni odbor ili najmanje 15 delegata Skupštine odnosno strukovni razred u sastavu Komore.

Predsjednik Komore mora sazvati vanrednu sjednicu Komore, najkasnije u roku od 30 dana od dana prijema zahtjeva iz stava 2. ovog člana.

Član 32.

Rad Skupštine se uređuje Poslovníkom o radu Skupštine.

Član 33.

Skupština može punovažno odlučivati ukoliko sjednici više od 50% delegata Skupštine.

Skupština donosi odluke, zaključke i druge akte iz svoje nadležnosti većinom glasova ukupnog broja prisutnih delegata Skupštine.

Glasanje na Skupštini se vrši aklamacijom prisutnih delegata, dizanjem ruke i izjašnjavanjem «ZA», «PROTIV» ili «SUZDRŽAN».

Glasanje po posredniku nije dozvoljeno, kao ni glasanje po punomoći.

Član 34.

Skupština bira predsjednika i dva potpredsjednike Komore koji su istovremeno po svojoj funkciji i predsjednik i potpredsjednici Skupštine, kao i članove organa Komore na period od četiri godine, sa mogućnošću izbora za još jedan uzastopni mandatni period.

Izuzetno od stava 1. ovog člana, prvi mandat predsjednika i dva potpredsjednika Komore, kao i članova organa Komore koji se biraju i imenuju u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Skupština može na obrazložen prijedlog Upravnog odbora, predsjednika i potpredsjednike Komore, koji su istovremeno po svojoj funkciji i predsjednik i potpredsjednici Skupštine, članove organa Komore razriješiti i prije isteka mandata na koji su birani i odmah izabrati nove članove.

Predsjednik i potpredsjednici Komore, koji su istovremeno po svojoj funkciji i predsjednik i potpredsjednici Skupštine, te članovi organa Komore mogu biti razriješen dužnosti i prije isteka mandata za koji su izabrani, i to u slučajevima:

- podnošenjem ostavke,
- ukoliko ne izvršavaju odluke i zaključke, kao i druge akte Skupštine i Upravnog odbora,
- ako u obavljanju svoje funkcije naprave neopravdani finansijski gubitak,
- u svojem radu krši propise iz oblasti zdravstva, kao akte Komore ili neopravdano ne izvršavaju odluke Upravnog odbora ili postupaju u suprotnosti s njima,
- svojim nesavjesnim ili nepravilnim radom prouzrokuje Komoru veću štetu, zanemaruje ili nemarno obavlja svoju dužnost tako da su nastale ili mogu nastati veće smetnje u radu Komore.

Prije donošenja odluke o razrješenju u slučajevima navedenim u stavu 4. alineje 2, 3, 4. i 5. ovog člana, Komora je dužna obavijestiti lica koja razrješavaju funkcije o razlozima za razrješenje i dati im mogućnost da se o njoj pismeno izjasne u roku od 30 dana od dana prijema obavijesti.

Odluka Skupštine o razrješenju lica u slučajevima navedenim u stavu 4. ovog člana je konačna.

Ako prijevremeno prestane mandat predsjednika odnosno potpredsjednika Komore, koji su istovremeno po svojoj funkciji i predsjednik i potpredsjednici Skupštine ili člana organa Komore, Skupština na prvoj narednoj sjednici bira nova lica na navedene funkcije.

2.Upravni odbor

Član 35.

Upravni odbor je izvršni organ Komore koji sprovodi odluke, zaključke i smjernice Skupštine.

Usklađen sastav Upravnog odbora, saglasno odredbama Zakona o zdravstvenoj zaštiti i Zakona o stomatološkoj djelatnosti, podrazumjeva da Upravni odbor ima 18 članova od kog broja su 16 doktora stomatologije, a po funkciji su 2 člana, i to: predsjednik Upravnog odbora zubnih tehničara i predsjednik Upravnog odbora stomatoloških sestara- tehničara.

Odluku o imenovanju predsjednika i članova Upravnog odbora donosi Skupština.

Član 36.

Rad Upravnog odbora se uređuje Poslovníkom o radu Upravnog odbora. Poslovník iz stava 1. ovog člana podliježe davanju saglasnosti od strane Skupštine.

Član 37.

Mandat članova Upravnog odbora traje četiri godine, sa mogućnošću ponovnog izbora za još jedan uzastopni mandatni period.

Članu Upravnog odbora može prestati mandat i prije isteka roka na koji je imenovan, i to u slijedećim slučajevima:

- podnošenjem ostavke,
- opozivom,
- prestankom rada u Komori,
- neopravdanim izostankom sa tri sjednice Upravnog odbora u toku jedne godine,
- kao i u ustalim slučajevima navedenim u članu 31. stav 3. ovog Statuta.

Članovi Upravnog odbora imaju pravo na nadoknadu za svoj rad.

Visinu nadoknade iz stava 3. ovog člana utvrđuje Skupština.

Izuzetno od stava 1. ovog člana, prvi mandat Upravnog odbora koji se bira i imenuje u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Član 38.

Usklađene nadležnosti Upravnog odbora, saglasno odredbama Zakona o zdravstvenoj zaštiti i Zakona o stomatološkoj djelatnosti, podrazumjevaju obavljanje slijedećih poslova:

1.Predlaže Skupštini:

- Statut Komore i druge akte Komore,
- prijedlog Kodeksa stomatološke etike i deontologije,
- godišnji plan rada Komore,
- finansijski plan i završni račun Komore,
- priprema izbore za redovnu Skupštinu Komore, bira delegate za redovnu Skupštinu Komore,
- kandidate za predsjednika i potpredsjednika Komore,
- predsjednika i članove Suda časti,
- kandidate za Tužioca Komore i listu branioca Komore,
- kandidate za Predsjednika i članove odbora Komore,

- predlaže i priprema sve materijale za Skupštinu,
- mišljenja i daje sugestije koji se odnose na standarde i normative u stomatološkoj djelatnosti i dr.
- stručna mišljenja kod pripreme propisa koji su od uticaja na razvoj stomatološke struke,
- stručna mišljenja na nastavne planove i programe stomatološkog fakulteta, kao i srednjih škola za zubne tehničare i stomatološke sestre-tehničare saglasno potreba stomatološke struke.

2. Utvrđuje:

- ispunjenost uvjeta za izdavanje, obnavljanje i oduzimanje licence, i to na osnovu zajedničkih kriterija Komore,
- ispunjenost uvjeta za izdavanje mišljenja nadležnom ministru zdravstva, o opravdanosti izdavanja, produženja ili oduzimanja odobrenja za obavljanje poslova privatne praxe stomatoloških radnika, te početka, proširenja, promjene i prestanka rada zdravstvenih ustanova koje obavljaju stomatološku djelatnost, i to sa pozicije i očuvanja profesije koju zastupa,
- ispunjenost uvjeta za certificiranje članove Komore za upravljanje novim zdravstvenim tehnologijama ponaosob za doktora stomatologije, zubne tehničare i stomatološke sestre-tehničare,
- maksimalne cijene stomatoloških usluga za privatnu praksu stomatoloških radnika koja ne ostvaruje prihode putem zavoda osiguranja kantona,
- mišljenje na cijene stomatoloških usluga iz dobrovoljnog zdravstvenog osiguranja,
- Odluku o sistematizaciji radnih mjesta Ureda predsjednika i potpredsjednika Stomatološke komore Federacije Bosne i Hercegovine.

3. Odlučuje o:

- donošenju poslovnika o radu Upravnog odbora,
- izdavanju, obnavljanju i oduzimanju licence svojim članovima za teritorij Federacije,
- izdavanju mišljenja nadležnom ministru zdravstva o opravdanosti izdavanja, produženja ili oduzimanja odobrenja za obavljanje poslova privatne prakse stomatoloških radnika, te početka, proširenja, promjene i prestanka rada zdravstvenih ustanova koje obavljaju stomatološku djelatnost,
- davanju prijedloga federalnom ministru zdravstva za doktore stomatologije koje kandidira za dodjelu naziva primarijus,
- izdavanju mišljenja za obavljanje dopunskog rada doktora stomatologije,
- izdavanju certifikata članovima Komore za upravljanje novim zdravstvenim tehnologijama ponaosob za doktora stomatologije, zubne tehničare i stomatološke sestre-tehničare,
- ovjeravanju cjenovnika stomatoloških usluga privatne prakse stomatoloških radnika,
- donosi Odluku o popunjavanju radnih mjesta Ureda predsjednika i potpredsjednika Stomatološke komore Federacije Bosne i Hercegovine.

4. Obavlja poslove i zadatke:

- zastupanja interesa svojih članova kod sklapanja ugovora sa zavodom zdravstvenog osiguranja Federacije odnosno kantona i drugim osiguravajućim zavodima,
- osigurava zaštitu građanima u ostvarivanju prava s obzirom na kvalitet, sadržaj i vrstu stomatološke usluge koja im se pruža,
- kontrole načina oglašavanja i način isticanja naziva privatne prakse stomatoloških radnika, te utvrđuju slučajeve koji se ne smatraju reklamiranjem stomatoloških usluga,
- formira fondove za pomoć svojim članovima uz prethodnu saglasnost Skupštine,
- brine se o materijalnim i drugim interesima svojih članova,
- pruža pravnu pomoć svojim članovima i organizuje mogućnost osiguranja protiv

odštetnih zahtjeva iz oblasti stomatološke djelatnosti.

Pored poslova i zadataka navedenih u tač.1, 2, 3. i 4. stava 1. ovog člana, Upravni odbor vrši i druge poslove određene ovim Statutom, aktima donijetim na osnovu Statuta, te odlukama i zaključcima Skupštine.

Izuzetno, Upravni odbor može donositi opće akte iz nadležnosti Skupštine, sa obavezom da ih Skupština potvrdi na sljedećem narednom zasjedanju.

Član 39.

Upravni odbor je dužan podnijeti izvještaj o svom radu Skupštini, najmanje jedanput godišnje, odnosno i češće, ovisno o odlukama i zaključcima Komore.

3. Upravni odbor Strukovnog razreda zubnih tehničara

Član 40.

Upravni odbor Strukovnog razreda zubnih tehničara (u daljem tekstu: Upravni odbor zubnih tehničara) ima najviše 10 članova.

Članovi Upravnog odbora zubnih tehničara su zubni tehničari:

- iz svakog kantona po jedan član
- jedan član Komore kojeg imenuje i razrješava predsjednik Komore.

Predsjednika i zamjenika predsjednika Upravnog odbora zubnih tehničara biraju između sebe članovi ovog Upravnog odbora.

Predsjednik Upravnog odbora zubnih tehničara automatski je delegat Skupštine Komore, kao i član Upravnog odbora Komore.

Predsjednik Komore, potpredsjednik Komore koji je doktor stomatologije i sekretar Komore učestvuju u radu Upravnog odbora zubnih tehničara bez prava odlučivanja.

Član 41.

Upravni odbor zubnih tehničara:

- donosi opće akte i odluke koje se odnose isključivo na djelatnost zubnih tehničara;
- donosi Poslovnik o radu Upravnog odbora;
- usklađuje međusobne interese i rješava sporna pitanja između zubnih tehničara na teritoriji Federacije,
- donosi odluku o povezivanju i saradnji Komore sa drugim srodnim organizacijama zubnih tehničara;
- zauzima stavove i daje mišljenja o pitanjima vezanim za djelatnost zubnih tehničara o kojima raspravlja Skupština;
- može staviti obrazložen veto na glasanje o dokumentu ili aktu iz nadležnosti Skupštine ukoliko smatra da je navedenim dokumentima ugrožen interes struke zubnih tehničara,
- donosi prijedloge i preporuke koji su od općeg značaja za obavljanje djelatnosti zubnih tehničara;
- predlaže Skupštini Komore Kodeks etike i deontologije zubnih tehničara, zajedno sa Upravnim odborom stomatoloških sestara;
- uz prethodnu saglasnost predsjednika Komore predlaže Skupštini Komore po jednog člana u Suda časti (Suda časti prvog stepena i Visoki sud časti)
- uz prethodnu suglasnost predsjednika Komore predlaže jednog člana za svaki odbor pri Komori propisano odredbama ovog Statuta,
- daje mišljenje na nacrt propisa, te općih akata Komore u dijelu koji se odnosi na zubne tehničare;
- brine se o čuvanju i unapređivanju društvenog položaja i digniteta zubnih tehničara;
- obavlja i druge poslove koji prema ovom Statutu, zakonu ili drugim općim aktima pripadaju u njegov djelokrug.

4. Upravni odbor Strukovnog razreda stomatološke sestre-tehničara

Član 42.

Upravi odbor Strukovnog razreda stomatoloških sestara-tehničara (u daljem tekstu: Upravni odbor stomatoloških sestara) ima najviše 10 članova.

Članovi Upravnog odbora stomatoloških sestara su stomatološke sestre:

- iz svakog kantona po jedan član
- jedan član Komore kojeg imenuje i razrješava predsjednik Komore.

Predsjednika i zamjenika predsjednika Upravnog odbora stomatoloških sestara biraju između sebe članovi ovog Upravnog odbora.

Predsjednik Upravnog odbora stomatoloških sestara automatski je delegat Skupštine Komore, kao i član Upravnog odbora Komore.

Predsjednik Komore, potpredsjednik Komore koji je doktor stomatologije i sekretar Komore učestvuju u radu Upravnog odbora stomatoloških sestara bez prava odlučivanja.

Član 43.

- Upravni odbor stomatoloških sestara:
- donosi opće akte i odluke koje se odnose isključivo na djelatnost stomatoloških sestara-tehničara
- donosi Poslovnik o radu Upravnog odbora stomatoloških sestara;
- usklađuje međusobne interese i rješava sporna pitanja između stomatoloških sestara-tehničara na teritoriju Federacije
- donosi odluku o povezivanju i saradnji Komore sa drugim srodnim organizacijama stomatoloških sestara-tehničara,
- zauzima stavove i daje mišljenja o pitanjima vezanim uz djelatnost stomatoloških sestara-tehničara o kojima raspravlja Skupština;
- može staviti obrazložen veto na glasanje o dokumentu ili aktu iz nadležnosti Skupštine ukoliko smatra da je navedenim dokumentima ugrožen interes struke stomatoloških sestara-tehničara,
- donosi prijedloge i preporuke koji su od općeg značaja za obavljanje djelatnosti stomatoloških sestara-tehničara;
- predlaže Skupštini Komore Kodeks etike i deontologije zubnih tehničara i stomatoloških sestara-tehničara, zajedno sa Upravnim odborom zubnih tehničara;
- uz prethodnu saglasnost predsjednika Komore predlaže jednog člana za svaki odbor pri Komori propisano odredbama ovog Statuta;
- daje mišljenje na nacрте propisa, te općih akata Komore u dijelu koji se odnosi na stomatološke sestre-tehničare,
- brine se o čuvanju i unapređivanju društvenog položaja i digniteta stomatoloških sestara-tehničara;
- obavlja i druge poslove koji prema ovom Statutu, zakonu ili drugim općim aktima pripadaju u njegov djelokrug.

5. Predsjednik i potpredsjednici Komore, odnosno predsjednik i potpredsjednici Skupštine (Napomena: Izbrisani čl. 44. i 45. i pomjerena numeracija članova!)

Član 44.

Mandat predsjednika i potpredsjednika Komore, koji su istovremeno po svojoj funkciji predsjednik i potpredsjednici Skupštine, traje četiri godine, sa mogućnošću ponovnog izbora za još jedan uzastopni mandat.

Izuzetno od stava 1. ovog člana, prvi mandat predsjednika i potpredsjednika Komore koji se biraju i imenuje u proceduri usaglašavanja rada Komore sa Zakonom o zdravstvenoj

zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore, kao i odluke o predstavljanju i zastupanju Komore od strane Skupštine.

Član 45.

Predsjednik Komore koji je po svojoj funkciji i predsjednik Skupštine:

- predstavlja i zastupa Komoru,
- saziva i vodi sjednice Skupštine,
- prisustvuje sjednicama Upravnog odbora bez prava glasa;
- stara se o izvršenju odluka i zaključaka Skupštine i Upravnog odbora, kao i upravnih odbora strukovnih razreda;
- ima pravo veta na odluke Upravnog odbora, upravnih odbora strukovnih razreda, te odluke odbora Komore i drugih organa Komore ukoliko posumnja da pojedina odluka nije u skladu sa zakonom, Statutom Komore i drugim aktima Komore, te u slučaju da odluka strateski nije u interesu Komore,
- priprema prijedlog Sistematizaciju radnih mjesta Ureda predsjednika i potpredsjednika Stomatološke komore Federacije Bosne i Hercegovine, usaglašeno sa potpredsjednicima Komore,
- priprema prijedlog Odluke o popunjavanju radnih mjesta Ureda predsjednika i potpredsjednika Komore, usaglašeno sa potpredsjednicima Komore,
- provodi postupak popunjavanja upražnjenih pozicija radnih mjesta u Uredu predsjednika i potpredsjednika Stomatološke komore Federacije Bosne i Hercegovine,
- donosi pojedinačne odluke o zasnivanju radnog odnosa u Uredu predsjednika i potpredsjednika Stomatološke komore Federacije Bosne i Hercegovine, zaključuje ugovore o radu, te donosi pojedinačne odluke o visini plaće i naknade na plaću,
- obavlja i druge poslove određene Statutom ili aktima Komore, te i one poslove koje mu izravno povjeri Skupština, odnosno Upravni odbor ili upravni odbori strukovnih razreda.

Član 46.

Za obavljanje svog posla, predsjednik Komore je odgovoran Skupštini. Predsjednik Komore dužan je o svom radu izvještavati Skupštinu najmanje jedanput godišnje, a Upravni odbor, kao i upravni odbor strukovnih razreda periodično.

Predsjednik Komore može biti razriješen dužnosti i prije isteka mandata u slučajevima i po postupku utvrđenom članom 34. Statuta.

Član 47.

Podpredsjednici Komore zamjenjuju predsjednika Komore u slučaju njegove odsutnosti ili spriječenosti.

Podpredsjednici Komore obavlja i druge poslove utvrđene Statutom, aktima Komore, te poslove koje im povjeri predsjednik Komore.

Potpredsjednici komore mogu biti razriješeni i prije isteka mandata u slučajevima i po postupku, a u smislu člana 34. ovog Statuta.

Član 48.

U slučaju da predsjednik Komore ne može više obavljati svoju funkciju, istu obavlja potpredsjednik Komore, a najduže do slijedeće redovne sjednice Komore.

6. Nadzorni odbor

Član 49.

Nadzorni odbor se bira na Skupštini neposrednim glasanjem između više kandidata koje predlažu delegati Skupštine.

Nadzorni odbor broji 5 članova od koga su tri doktora stomatologije i dva iz strukovnih razreda.

Predsjednika i članove Nadzornog odbora imenuje i razrješava Skupština.

Mandat predsjednika i članova Nadzornog odbora traje četiri godine, sa mogućnošću ponovnog izbora za još jedan uzastopni mandat.

Izuzetno od stava 4. ovog člana, prvi mandat Nadzornog odbora koji se bira i imenuje u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Bliži rad Nadzornog odbora uređuje se poslovníkom o radu Nadzornog odbora.

Poslovník iz stava 7. ovog člana podliježe saglasnosti Skupštine.

Član 50.

Nadzorni odbor je dužan najmanje dva puta godišnje pregledati finansijsko poslovanje Komore i završni račun.

Nadzorni odbor razmatra zakonitost odluka i zaključaka koje donose organi Komore.

Nadzorni odbor o svom radu podnosi izvještaje Skupštini, te predlaže usvajanje završnog računa.

7. Sud časti

Član 51.

Sud časti je nezavisni organ Komore koji odlučuje o povredama dužnosti i ugleda stomatoloških radnika u skladu sa Kodeksom stomatološke etike i deontologije, Kodeksom etike i deontologije zubnih tehničara i stomatoloških sestara-tehničara, ovim Statutom, te akata donijetih na osnovu Statuta.

Sud časti se sastoji od Suda časti prvog stepena i Visokog suda časti drugog stepena.

Sud časti prvog stepena i Visoki sud časti drugog stepena ima predsjednike i po 3 člana koje imenuje i razrješava Skupština na prijedlog Upravnog odbora na mandat od četiri godine sa mogućnošću izbora za još jedan mandatni period.

Izuzetno od stava 3. ovog člana, prvi mandat Suda časti prvog stepena i Visokog suda časti drugog stepena koji se biraju i imenuju u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Odluka Visokog suda časti je konačna.

Sud časti prvog stepena i Visoki sud časti drugog stepena rade u skladu sa Pravilnikom o odgovornosti stomatoloških radnika koji donosi Skupština.

8. Tužilac Komore

Član 52.

Tužilac Komore je nezavisni organ Komore koji po službenoj dužnosti predlaže pokretanje postupka protiv članova Komore zbog povreda dužnosti i ugleda zvanja stomatoloških radnika u skladu sa Kodeksom stomatološke etike i deontologije, Kodeksom etike i deontologije zubnih tehničara i stomatoloških sestara-tehničara, ovog Statuta, te akata donijetih na osnovu Statuta.

Tužilac Komore ima svog zamjenika.

Tužioca Komore i njegovog zamjenika bira i razrješava Skupština, na prijedlog Upravnog odbora na mandat od četiri godine sa mogućnošću izbora za još jedan mandatni period.

Izuzetno od stava 3. ovog člana, prvi mandat tužioca Komore i njegovog zamjenika koji se biraju i imenuju u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Tužilac Komore radi u skladu sa Pravilnikom o odgovornosti stomatoloških radnika koji donosi Skupština.

9. Branilac Komore

Član 53.

Branilac Komore je nezavisni organ Komore koji po službenoj dužnosti obavlja poslove pravne zaštite i zastupanja članova Komore u postupcima pred Sudom časti Komore.

Listu branilaca Komore utvrđuje Skupština na prijedlog Upravnog odbora, kao i upravnih odbora strukovnih razreda na mandat od četiri godine sa mogućnošću izbora za još jedan mandatni period.

Izuzetno od stava 2. ovog člana, prvi mandat branioca Komore koji se biraju i imenuju u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Branilac Komore radi u skladu sa Pravilnikom o odgovornosti stomatoloških radnika i Pravilnika o osiguranju za slučaj utvrđivanja profesionalne odgovornosti.

Ukoliko se protiv člana Komore vodi postupak zbog počinjene profesionalne greške tokom obavljanja poslova svog stručnog zvanja pred sudovima, arbitražama i drugim državnim organima i organizacijama u zemlji i inostranstvu, a u kojima istaknuti odštetni i drugi zahtjevi iz oblasti stomatološke djelatnosti, Komora može, radi pravne zaštite i zastupanja člana Komore, angažirati i druga stručna lica iz raznih profesija (advokati, sudski vještaci i dr.), a koji posjeduju posebnu stručnost koju branioci Komore nemaju.

Troškovi vođenja postupka iz stava 4. ovog člana uređuju se odlukom Skupštine, a saglasno Pravilniku o osiguranju za slučaj utvrđivanja profesionalne odgovornosti.

10. Odbori Komore

Član 54.

Komora ima stalne i povremene odbore kao svoja radna tijela.
Stalni odbori Komore su:

- Odbor za stomatološku etiku i deontologiju,
- Odbor za stručna pitanja,
- Odbor za stručno usavršavanje,
- Odbor za staleška pitanja i privatnu praksu,
- Odbor za obavljanje stručnog nadzora nad radom stomatoloških radnika.
- Odbor za obavljanje vještačenja,
- Odbor za ekonomsko-finansijska pitanja,
- Odbor za administrativna pitanja

Djelokrug rada i broj članova svakog odbora bliže se određuje posebnom odlukom Skupštine.

Način rada odbora urediti će se poslovnica o radu odbora Komore koje donosi odbori, a saglasnost na iste daje Skupština.

Predsjednik i članovi odbora Komore imenuje se na period od četiri godine, sa mogućnošću izbora za još jedan mandatni period.

Izuzetno od stava 5. ovog člana, prvi mandat predsjednika i članova odbora Komore koji se biraju i imenuju u proceduri usaglašavanja rada Komore sa Zakonom o zdravstvenoj zaštiti i Zakonom o stomatološkoj djelatnosti, počinje teći od dana donošenja ovog Statuta, te odluke o imenovanju organa i tijela Komore od strane Skupštine.

Član 55.

S ciljem obavljanja stručno-operativnih, stručno-nadzornih, informaciono-dokumentacionih, normativno-pravnih, administrativno-tehničkih, računovodstveno-materijalnih i drugih poslova saglasno djelatnosti Komore utvrđene Zakonom i ovim statutom, formira se posebno administrativno tijelo Ured predsjednika i potpredsjednika Stomatološke komore Federacije Bosne i Hercegovine.

Sistematizaciju radnih mjesta Ureda predsjednika i potpredsjednika Stomatološke komore Federacije Bosne i Hercegovine, sa tačnim nazivima i vrstama radnih mjesta; nazivom, rasporedom i opisom pojedinačnih poslova; potrebnim uvjetima u pogledu stručne spremlje i drugim uvjetima za prijem u radni odnos, te broju izvršilaca; odgovornostima izvršilaca prema predsjedniku, potpredsjednicima Komore, Upravnom odboru Komore i svim članovima Komore; postupku zasnivanja radnog odnosa, utvrđuje Upravni odbor Komore na usaglašen prijedlog predsjednika i potpredsjednika Komore.

Odluku o popunjavanju radnih mjesta Ureda predsjednika i potpredsjednika Komore donosi Upravni odbor, na usaglašen prijedlog predsjednika i potpredsjednika Komore, a u skladu sa finansijskim mogućnostima Komore.

Provođenje postupka popunjavanja upražnjenih pozicija radnih mjesta u Uredu predsjednika i potpredsjednika Stomatološke komore Federacije Bosne i Hercegovine, na osnovu ovog Statuta, Sistematizacije radnih mjesta Ureda predsjednika i potpredsjednika Stomatološke komore Federacije Bosne i Hercegovine, kao i odluke iz stava 3. ovog člana, provodi predsjednik Komore.

Pojedinačne odluke o zasnivanju radnog odnosa u Uredu predsjednika i potpredsjednika Stomatološke komore Federacije Bosne i Hercegovine, kao i pojedinačne odluke o visini plaće i naknade na plaću uposlenika u Uredu predsjednika i potpredsjednika Komore, kao i zaključivanje ugovora o radu donosi odnosno zaključuje predsjednik Komore.

XI- ODNOS PREMA KOMORAMA IZ OBLASTI ZDRAVSTVA

Član 56.

Komora se obavezuje da će se u svom radu pridržavati zakona iz oblasti zdravstva, ovog Statuta, te akata donijetih na osnovu Statuta.

Komora se obavezuje da će sve svoje akte redovno usklađivati sa zakonima iz oblasti zdravstva, kao i propisima donijetim na osnovu tih zakona.

Ostvarivanje saradnje sa drugim komorama iz oblasti zdravstva osnovanim na kantonalnom i federalnom nivou, komorama u BiH, zemljama okruženja i Evropskoj uniji, stomatološkim udruženjima u BiH, zemljama okruženja i Evropskoj uniji; posebno FDI, ERO-u i FEDCAR-u, CED-u, te drugim evropskim i svjetskim udruženjima koje se bave stomatološkom profesijom, obavlja se isključivo i samo preko Komore.

Komora je dužna obustaviti svaki akt ili postupak koji je suprotan odredbama zakona iz oblasti zdravstva, kao i propisima donijetim na osnovu tih zakona.

XII- ZAŠTITA PRAVA ČLANOVA KOMORE

Član 57.

Sve odluke, odnosno rješenja o ostvarivanju prava i obaveza članova Komore obavezno se dostavljaju članovima Komore u pismenom obliku s poukom o pravnom lijeku.

Član 58.

Protiv odluka organa Komore, izuzev odluka Visokog suda časti, član Komore ima pravo žalbe predsjedniku Komore, u roku od 15 dana od dana uručenja odluke odnosno rješenja.

Izuzetno od stava 1. ovog člana, protiv odluke Visokog suda časti, žalba se podnosi Skupštini.

Podnošenje žalbe zadržava od izvršenja odluke odnosno rješenja do konačne odluke predsjednika Komore, izuzev žalbe na rješenje o oduzimanju licence koja ne zadržava izvršenje rješenja.

Odluke po žalbi imaju se donijeti u roku od 30 dana od dana podnošenja žalbe.

XIII- JAVNOST RADA**Član 59.**

Rad Komore je javan.

Javnost rada Komore se osigurava:

- podnošenjem izvještaja o radu,
- objavljivanjem akta na WEB stranici Komore,
- obavještavanjem javnosti o radu Komore,
- organizovanjem press konferencija i
- drugim načinima koji čine rad Komore dostupnim javnosti, saglasno Zakonu o slobodi pristupa informacijama u Federaciji Bosne i Hercegovine („Službene novine Federacije BiH“, br. 32/01 i 48/11).

Član 60.

Izvještaji o radu Komore, kao i izvještaji o radu organa Komore redovno se dostavljaju Skupštini, kao i članstvu Komore, Federalnom ministarstvu zdravstva, a po potrebi drugim i resornim ministarstvima i drugim organima i institucijama kad je to predviđeno propisima i kada na posredan ili neposredan način imaju interesa za djelatnost Komore.

Organi Komore su dužni informisati članstvo o svim pitanjima o kojima se raspravlja ili donose određene odluke i to putem biltena, publikacija i sl.

Član 61.

Informacije u posjedu Komore mogu se saopštavati i fizičkim i pravnim licima u postupku i na način propisan Zakonom o slobodi pristupa informacijama u Federaciji Bosne i Hercegovine.

Informacije u posjedu Komore iz stava 1. ovog člana saopštava predsjednik Komore ili u njegovoj odsutnosti potpredsjednici Komore ili lice koju ovlasti predsjednik Komore

Član 62.

Neovlašteno odavanje informacija u posjedu Komore predstavlja težu povredu odredbi ovog statuta.

Odlukom Skupštine se određuje način i postupak provođenja ispitivanja lica zbog neovlaštenog odavanja informacija iz stava 1. ovog člana, te mjere koje se mogu poduzeti protiv navedenog lica, a nakon okončanog postupka, te pravo žalbe, sa naznačenjem kome se podnosi i u kom roku.

XIV- POSLOVNA TAJNA**Član 63.**

Poslovnom tajnom smatraju se isprave i podaci čije bi saopštavanje ili davanje na uvid neovlaštenoj osobi bilo protivno poslovanju Komore ili štetilo njenom ugledu, odnosno interesu ili ugledu članova Komore, te štetilo generalno obavljanju djelatnosti Komore.

Član 64.

Poslovnu tajnu dužni su čuvati predsjednik i potpredsjednici Komore, koji su istovremeno po svojoj funkciji predsjednik i potpredsjednici Skupštine, predsjednici i članovi organa Komore, lica koja profesionalno rade za Komoru, sekretar Komore i to trajno, bez obzira na trajanje njihovog mandata odnosno angažmana.

Član 65.

Poslovnom tajnom posebno se smatraju:

- dokumenti koje Skupština proglašuje poslovnom tajnom,
- podaci koje nadležna tijela kao povjerljive saopšte Komori,
- mjere i način postupanja u slučaju nastanka vanrednih okolnosti.

Član 66.

O čuvanju poslovne tajne neposredno brine predsjednik Komore..

Isprave i podaci koji se smatraju poslovnom tajnom ne mogu se neovlašteno saopštavati niti činiti dostupnim neovlaštenim osobama.

Saglasno članu 67. Statuta, povreda dužnosti čuvanja poslovne tajne predstavlja težu povredu odredbi ovog statuta.

XV- PRAĆENJE RADA KOMORE

Član 68.

Saglasno članu 221. Zakona Federalno ministarstvo zdravstva prati rad Komore sa stanovišta provođenja zakona i utvrđene politike iz oblasti zdravstva, te predlaže odgovarajuće mjere za unapređenje njenog rada.

XVI- PRESTANAK RADA KOMORE

Član 69.

Odluku o prestanku rada Komore može donijeti samo Skupština dvotrećinskom većinom delegata Skupštine.

Član 70.

U slučaju prestanka rada Komore njena imovina prelazi u vlasništvo osnivača Komore.

XVII- PRELAZNE I ZAVRŠNE ODREDBE

Član 71.

Stomatološki radnici: doktori stomatologije, zubni tehničari, stomatološke sestre-tehničari sa teritorije Federacije, koji su do dana stupanja na snagu ovog Statuta završili stomatološki fakultet, odnosno srednju školu za zubne tehničare ili stomatološke sestre-tehničare, te položili stručni ispit u svom stručnom zvanju, dužni su na način i pod uvjetima utvrđenim ovim Statutom pribaviti od nadležnog organa Komore, licencu u roku od 3 mjeseca računajući od dana upisa promjena Komore, u postupku usklađivanja rada Komore sa Zakonom o zdravstvenoj zaštiti i Zakonom o stomatološkoj djelatnosti, u sudski registar kod nadležnog općinskog suda.

Važeće licence izdate doktorima stomatologije od Komore liječnika-doktora stomatologije Federacije Bosne i Hercegovine, odnosno važeće licence izdate zubnim tehničarima i stomatološkim sestrama-tehničarima od komora medicinskih sestara-tehničara ostaju na snazi do dana isteka roka važnosti licenci.

U slučaju iz stava 2. ovog člana, Komora liječnika-doktora stomatologije Federacije Bosne i Hercegovine odnosno komora medicinskih sestara-tehničara dužne su po službenoj dužnosti ili na zahtjev stomatološkog radnika, Komori dostaviti dokumentaciju na osnovu koje

su izdate licence, kao i potvrdu da od vremena izdavanja licence do predaje navedenih isprava nije došlo do izmjene okolnosti na osnovu kojih su izdate licence.

Po prijemu isprava iz stava 3. ovog člana nadležni organ Komore izdaje potvrdu o prijemu i važnosti licenci izdatih saglasno ranijim propisima iz ove oblasti, a koja se koristi u pravnom saobraćaju zajedno sa važećom licencom.

Izuzetno od stave 1 ovog člana, stomatološki radnici koji prava i obaveze ostvaruju kao članovi komore kantona i posjeduju licence izdatu od stomatološke komore kantona, nisu obavezni pribaviti licencu od Komore u roku utvrđenom u stavu.1 ovog člana, ako poslove stručnog zvanja obavljaju samo na području kantona za koje je izdata kantonalna licence.

Član 72.

Postupci pokrenuti od strane članova Komore pred organima i tijelima Komore, a prije donošenja ovog statuta, okončan će se saglasno odredbama statuta i akata koji su bili u primjeni prije stupanja na snagu ovog statuta.

Član 73.

Skupština Komore donosi Statut, kao i njegove izmjene i dopune, te je jedina ovlaštena za autentično tumačenje njegovih odredbi.

Član 74.

Komora će akta koji se donose na osnovu ovog statuta donijeti u roku od godinu dana od dana stupanja na snagu istog, izuzev akata za koje je Zakonom i propisima donijetim na osnovu Zakona propisan kraći rok.

Član 75.

Stupanjem na snagu ovog statuta prestaje važnost Statuta Komore liječnika-doktora stomatologije Federacije Bosne i Hercegovine, broj. 01/00 od 17.06.2000. godine, kao i izmjena i dopuna Statuta Statuta Komore liječnika-doktora stomatologije Federacije Bosne i Hercegovine broj: 69-58/02 od 1.06.2002. godine, broj: 90-01/03 od 25.07.2003. godine, broj: 150/09 od 24.04.2009. godine, broj: 165-1/09 od 23.05. 2009. godine i broj: 04-11-21./12 od 07.12.2012. godine

Član 76.

Ovaj Statut stupa na snagu donošenjem odluke Skupštine Komore, a primjenjivaće se od momenta upisa promjena, u postupku usklađivanja rada Komore sa Zakonom o zdravstvenoj zaštiti i Zakonom o stomatološkoj djelatnosti, u sudski registar kod nadležnog općinskog suda.

Član 77.

Prečišćeni tekst Statuta obuhvata:

- Statut Stomatološke komore Federacije Bosne i Hercegovine, broj: 01-1-od 05.02.2013. godine,
- Odluka o izmjeni i dopuni Statuta Stomatološke komore Federacije Bosne i Hercegovine, broj: 01-1-331 /14 od 27.10.2014. godine,
- Odluka o izmjeni i dopuni Statuta Stomatološke komore Federacije Bosne i Hercegovine, broj: 01-2-13-333-19/15 od 18.09.2015. godine, Prezentirana na Skupštini 02.12.2016.godine
- Odluka o izmjeni i dopuni Statuta Stomatološke komore Federacije Bosne i Hercegovine, broj: 01-2-13-36-6/16 od 29.01.2016. godine, prezentirana na Skupštini 02.12.2016.
- Odluka o izmjeni i dopuni Statuta Stomatološke komore Federacije Bosne i Hercegovine, broj: 01-2-13-361-16/16 od 7.10.2016. godine, u kojima j e naznačen datum stupanja na snagu Statuta, kao i odluka. Potvrđena na Skupštini 02.12.2016. godine

Član 78.

Prečišćen tekst Statuta objavit će se na WEB stranici Komore.

Broj: 01-2-237-25/17
Datum, 24.11.2017. godine
S a r a j e v o

PREDSJEDNIK UPRAVNOG ODBORA
Prim.dr.sc. Mirjana Duspara